


Čállinrámmat

Mo addit ohppiide čállinrámmaid go galget čállit teavsttaid? Addit čállinrámmaid ohppiide mearkaša doarjut ohppiid dainna lágiin ahte sii ožžot jurdagiid johtui, ja dihtet man birra áigot čállit ja mo áigot hábmet teavstta. Leat iešguđetge lágan vuogit mo addit čállinrámmaid. Okta ovdamearka lea hupmat ohppiiguin teakstahuksema birra, ja maiddái makkár dovdomearkkat teakstahámiin leat. Sáhtta maiddái juohkit ohppiide buriid teakstaovdamearkkaid maid sii besset lohkat, ja dainna lágiin oidnet oahppit ovdamearkkaid, ja besset jurddášit makkár hámat teavsttaid sáhttet hukset.

Čállinrámmat galget čalmmustahttit ohppiide čállinproseassa. Mii sáhttit čájehit ohppiide, čilget ja hupmat dan birra mo mii hukset teavstta. Ságastallamis ohppiiguin galggašii deattuhit hupmat teavstta ulbmila birra, manne mii galgat čállit teavstta. Ulbmil lea dehálaš oassi danne vái oahppit galget beassat jurddášit ovdal go čálligohtet. Manne sii galget čállit, geasa sii čállet ja masa teaksta galgá geavahuvvot, dainna lágiin sáhttet govahallat makkár sisdoallu ja hápmi teavsttas galgá leat. Čielga doarjjastruktuvrrat dego teakstaovdamearkkat, ja ovdamearkkat álgocealkagiidda, goalloscealkkavuorká ja iešguđetge čállinrámmat sáhttet leat anolaččat, ja addet ohppiide čállinrámmaid.



Hábmen

Ohppiid galgá oahpásmuhttit ollu iešguđetge lágan teavsttaide ja hámiide. Lea dehálaš čájehit ohppiide makkár dovdomearkkat iešguđetge teavsttain leat. Mii sáhttit čájehit ohppiide mánggalágan teakstahámiid, nugo matematihkka

njuolggadusčilgehusteavsttaid, dahje jo luonddufága- ja servodatfágateavsttaid dahje eará fágain, mat fuomášuhttet gáldogeavaheami. Go oahppit galget čállit teavsttaid, de lea dehálaš ahte sis lea jurdda ahte mo sáhtta teavstta hábmet.

Lea maiddá dehálaš go geahčča ovdamearkateavsttaid, ahte oahppit goitge dovdet friddjavuođa čállit iežaset teavsttaid, eai ge dárbbas čuovvut makkárge minstariid čuoggás čuoggái. Teakstaovdamearkkat galget čájehit ohppiide obbalaččat teavstta hámi, vai sii besset jurddašit makkár hápmi teavsttas sáhtta leat, mo teavstta ja govaid sáhtta bidjat vai šaddá buorre ja čorges čálus.

Lea vuogas geavahit buriid ohppiidčállošiid ovdamearkan, go dain lea dat čállindási maid oahppit galggašedje máhttit ja olahit. Sáhtta maiddá buorre reaidun geavahit teavsttaid maid oahpaheaddji lea čállán muhtin oahppoulbmiliid birra.

Go ságastallá ohppiiguin berre mearkkašahttit daid beliid mat gusket tekstii, nugo teavstta hámi, mo lea huksejuvvon, makkár hápmedási teavsttas lea, ja maiddá fágadoahpágiid jna.

Hábmen mearkkaša čalmmustahttit ohppiide čállinproseassa. Oahpaheaddji sáhtta čájehit ohppiide mo son čállá. Hábmen lea dehálaš bargu mii addá ohppiide ipmárdusa dasa ahte čállin dáhpáhuvvá mángga dásis, diehtoviežžamis, dárkkisteapmái ja loahpahussii. Oahpaheaddji sáhtta ovdamearkka dihte čállit álggahusa ovttas ohppiiguin, dalle besset oahppit addit ideaid ja leat mielde sihke čállimis ja dárkkisteamis. Dainna lágiin beassá mángii geahččat čálloša, ja heivehit dan ulbmiliid ja maiddá dasa masa galgá geavahuvvot. Hábmen mearkkaša čájehit makkár vuodđu dárbbasuvvo ovdal teaksta lea gárvis.

Čállinrámmat leat dehálaččat čállima oktavuodas. Ráhkadit cakkiid mat veahkehit ohppiid čállinproseassas, addet doarjaga ja ovdáneami ohppiide, dassázii go oahppit eai šat dárbbas daid. Lea dehálaš hupmat ohppiiguin ahte čállinrámmat leat dehálaš ja buorit neavvut maid sáhtta friddja geavahit, go galgá plánet ja struktureret teavstta.

Sámi lohanguovddáš 2015

Gáldot:

<http://www.udir.no/Utvikling/Ungdomstrinnet/Skriving/Ressurser-til-arbeidet-med-skriving/Skrivestrategier/Forskrivingsfase1/Forskrivingsfase/>

<http://www.skriresenteret.no/>

<http://lesesenteret.uis.no/>